



Inatsisartuni ilaasortaq Olga P. Berthelsen  
Inuit Ataqtigiit  
-/Maani

### § 36, imm. 1 naapertorlugu apeqqummut nr. 2010-260-mut akissut

Asasara Olga P. Berthelsen

Aallarniutigalugu apeqqutit saqqummiunneqartut pillugit qujarusuppunga, taakkulu imatut nipeqarput:

#### Naalakkersuisunut apeqqutit:

1. Illoqarfinni sorlarni Piginneqatigiilluni inissialiortitsinissaq takorloorneqarpa?
2. Illoqarfiit toqqarneqartussat suut tunngavigalugit toqqarneqassappat.
3. Illuut A/S qanoq ililluni illoqarfinni allani, piginneqatigiilluni inissialiortitsinermut atorneqarsinnaava?
4. Suna inatsit tunngavigineqarpa.

Oqaatigissavara apeqqutit saqqummiunneqartut nuannaarutigisorujussuugakkit, apeqqutit akineranni suliassaqarfimmi suliniutissat pillugit nassuiaateqarnissamut periarfissinneqarama.

#### 1. Illoqarfinni sorlarni Piginneqatigiilluni inissialiortitsinissaq takorloorneqarpa?

Illoqarfinni annerni sisamani piginneqatigiilluni inissianik amerlanerusunik sanaartornermik ingerlatsisoqarpoq aammalu aallartitsisoqarnissaa naatsorsuutigineqarluni. Tamatuma saniatigut suli sumiiffiit sorpiaat piginneqatigiilluni inissianik sanaartorfigineqassanersut suli aalajangerneqanngilaq, kisiannili Naalakkersuisut piffissami aggersumi suliassanut pilersaarutini aalajangersimasunik suliaqarlutik aallartissapput. Kisiannili piginneqatigiilluni inissialiortiternernik soorlu Tasiilami, Nanortalimmi, Maniitsumi Aasiannilu aallartitsisoqarsinnaassasoq naatsorsuutigineqarpoq.

Piginneqatigiilluni inissiat "ilaqutariinnut illut"-nik taaneqarsinnaasunut najoqqutassaq tunngavigalugu, tassalu piginneqatigiilluni inissiaatillit peqatigiiffii ataasiakkaat sisamaannarnik assigiinngitsunillu angissuseqartunik inissiaateqarlutik; soorlu sisamanik initalik ataaseq, pingasunik initalit marluk aamma marlunnik initalik ataaseq, sananeqarsinnaanissaat Naalakkersuisut siunnerfigaat. Taamaalilluni kinguaariit arlallit illumi ataatsimi najugaqarsinnaalissapput, aammalu inissiat angissusiinik pisariaqartitsinerup allanngornera malillugu ilaqutariit nuttarsinnaalissallutik.

9. december 2010  
Sagsnr. 2010-042507  
Dok.nr. 522488

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

Tamanna aamma utoqqaat sapinngisamik sivilunerpaamik namminneerlutik angerlarsimaffimmini najugaqaannarsinnaanissaat pillugu Naalackersuisut kissaateqarnerannut tapertaassaaq.

## **2. Illoqarfiit toqqarneqartussat suut tunngavigalugit toqqarneqassappat?**

Piginneqatigiilluni inissialiortiternerni pisariaqartitsinermik naliliinerit annertuumik tunngavigineqassapput. Pisariaqartitsinermik naliliinermi inissianik pisariaqartitsisoqavinnersoq, imaluunniit aamma illoqarfiup nutarterneqarnissaa (inissiatooqqat isaterneqarlutik nutaanik sanaartornissaa) pisariaqartinneqarnersoq tunngavigineqarsinnaavoq. Aamma ilaatigut najukkani sanasut pigineqaannarnissaasa qulakkeerneqarnissaa aallaavigineqassaaq.

## **3. Illuut A/S qanoq ililluni illoqarfinni allani, piginneqatigiilluni inissialiortitsinermut atorneqarsinnaava?**

Naalackersuisut piffissami aggersumi suliassanut aalajangersimasunut siunnersuusiussapput. Tassani ilaatigut najukkani titartaasarfii akornanni illussanik titartaasartunik unammisitsineq atorneqassaaq. Taamatut unammisitsineq illunut mikisunut, pissutsinut pilersaarutinut assigiinngitsunut atorneqarsinnaasunut aaqqiissuteqarnissamut siunnersuutitik eqqarsaatigilluakkanik pissarsinissamut iluaqutaassasoq Naalackersuisut neriutigaat. Sumiiffiit ilaanni nunap ilusaa eqqarsaatigalugu 2X2-nik (qulaani inissiat marluk aamma ataani marluk) sanaartortoqassappat naleqqunnerpaassaaq, sumiiffiillu ilaanni illut uiguleriit pitsaanerpaassallutik.

Aaqqiissutissatut siunnersuutitik aalajangersimasunik suliaqartoqarsimatillugu, illoqarfinni assigiinngitsuni sanaartugassanik aalajangersimasunik aallartitseqqullugu Naalackersuisut Illuut A/S qinnuigisinnaavaat. Aamma piginneqatigiilluni inissialiortiternissamik isumassarsiaq namminersortut piginneqatigiilluni inissiaatillit peqatigiiffiinik, soorlu Tasiilami, Qaqortumi, Maniitsumi Sisimiunilu ingerlareersut assinginik pilersitsinissamut isumassarsiorfigineqarsinnaassasoq neriutigaarput.

## **4. Suna inatsit tunngavigineqarpa?**

Piginneqatigiilluni inissialiornissamut inatsisitigut tunngavissat piginneqatigiilluni inissiat pillugit Inatsisartut peqqussutaanni nr. 2-mi, 16. maj 2008-meersumi nassaarineqarsinnaapput.

Piginneqatigiilluni inissiaatit pillugit peqqussummi imatut ilusiliinissaaq periarfissinneqarpoq:

- Kapitali 2: Inissianik piginneqatigiilluni inissiaatillit peqatigiiffiisa sanatitsisuuffigisaanik sananeq
- Kapitali 3: Inissianik nutaanik, sanatitsisup namminersortup sanaavinik, aammalu piginneqatigiilluni inissiaatillit peqatigiiffiannut tunniussassaanik sananeq
- Kapitali 4: Namminersorlutik Oqartussat imaluunniit kommuni piginneqatigiilluni inissianik sanasinnaapput

- Kapitali 5: Attartortut piginneqatigiilluni inissiatillit peqatigiiffiannik pilersitsisinnaapput, aammalu peqatigiiffiup illuut Namminersorlutik Oqartussanit kommunimilluunniit tigusiinnaavaa.

Ukiumoortumik aningaasanut inatsisit nassuiaatitaani 2011-mut Inatsisartut Aningaasanut Inatsisaanni Naalakkersuisut suliassanut aalajangersimasunut Illuut A/S-imik atuinissaannut piginnaatinneqarput (tak. suliassaqarfik 80 – 89 Sanaartorneq lluarsaasinerlu-mut oqaasertaliussat 8-miit 18-imut).

Neriuppunga matumuunakkut suliaq pillugu paasititsisimassallunga, aammalu annertunerusumik paasissutissiinissamut piareersimavunga.

Inussiarnersumik inuulluaqqusillunga

Jens B. Frederiksen